

渾源州志卷八總目

祠廟

寺觀

墳墓

渾源州志

渾源州知州泰興桂敬順纂修

祠廟

有功德於民標節概於世者皆禋祀之所謂聰  
明正直而爲神者也故盛明之世考典禮辨儀  
制斥淫崇正往往不絕於史書若夫家人委巷  
常祀亦間採之聊以備風土之一則云爾志祠  
廟

先農壇在城南一里雍正四年欽奉

上諭通行直省擇潔淨之地照九卿所耕藉田四畝  
九分之數設立先農壇於雍正五年爲始每歲仲  
春亥日地方官率所屬之員耆老農夫恭祭先農  
神照九卿耕藉之例行九推之禮其設立先農壇  
並恭祭先農俱令動支正項錢糧其所用數目各  
該地方官報明戶部查核藉田所收之米粟敬謹  
收貯以供各該處祭祀之粢盛部頒制度建大殿  
五間捲棚三間門樓一座圍牆四十七丈壇制高  
二尺一寸寬二丈五尺神牌高二尺四寸寬六寸

座高五寸寬九寸五分紅牌金字祭品用羊一豕  
一帛一鉶一籩四豆四簋二簋二致祭前期致齋  
二日祭日主祭官及各官俱朝服行禮禮畢各官  
俱易襟袍補服在省者巡撫秉耒知縣執青箱知  
府播種其外府州縣則守令秉耒佐貳執青箱以  
次遞降耕時耆老一人牽牛農夫二人扶犁九推  
九返農夫終畝農具俱用赤色牛隻用黑色箱用  
青色籽種悉照土宜壇宇用勤謹農夫二名看守  
免其差役給與口糧五年三月又奉部議耕藉日

期每年十月朔頒歷後交欽天監預擇吉期奉請頒行各省同日舉行著爲令

社稷壇在城西一里舊建正殿二楹官廳三間大門一座雍正十三年欽奉

上諭部頒制度壇橫縱胥廣二丈五尺高二尺一寸  
陛各三級繚以周垣四門紅油其石圭長二尺五  
寸方一尺瘞於壇南正中去壇二尺五寸只露圓  
尖神牌二以木爲之朱漆青字填寫神號屆祭期  
設於壇上祭畢藏弄潔淨處所每歲春秋二仲上

戊日陳設致祭祭品帛二俱黑色羊一豕一鰯一  
籩四豆四簋各二

風雲雷雨山川城隍壇在城南二里萬歷間州守盧  
點建正殿三楹於上齋宿廳三間於東久廢雍正  
十三年三月欽奉

上諭部頒制度同壇設三神位風雲雷雨居中山川  
居左城隍居右制帛七風雲雷雨帛四山川帛二  
城隍帛一俱白色祭品陳設行禮與社稷壇同

厲壇在城北一里舊建正殿一間今廢歲清明日七

月望日十月朔日祭無祀鬼神迎城隍神主之

城隍廟在州治西北

三皇廟在南門內

恒嶽廟在南門外

東嶽廟在東門外唐開元間州人馮安建

元帝廟在城北臺

三官廟在東門甕城

關帝廟四二在東西門甕城內一在南門一在木市

西爲勒馬廟明末鄰人謝作麟建

龍王廟在西門外順成街

馬王廟在州治南

聖母廟在東門外

財神廟在州治東

孟姜女廟在城東北龍角山上相傳秦時築城姜泣  
城墮後人壺廟

上帝閣在城中央

文昌閣二一在學宮明州守趙之韓建一在南門外  
律呂神祠在城北七里神谿孤石上北魏時建相傳



唐太和元年六月望宏州人張珪晚憩石上有神  
人空中言曰律呂律呂上天勅汝是月二十五日  
行硬雨語畢騰空而去珪至家徧語隣村使速收  
麥未及收者輒敗事聞朝廷遣使致祭元至元六  
年重修東昌教授麻治撰記明成化間靈葺

大白祠在磁窰峽東崖上有太白手書壯觀二字明  
成化十年府倅鮑克寬建

孫真人祠在城隍廟東

二神祠在州東街明成化初建祀關聖二郎神

旗燾神有祀無廟春祭驚蟄秋祭霜降守備土之祭  
費州領

附先農壇考衛宏漢儀春始東耕于藉田引詩  
先農則神農也賀循藉田儀漢耕日以太牢祭  
先農于田所薛綜注二京賦田在國之辰地賀  
循云所種之穀黍稷種稜稜早也種晚也干寶  
周禮注種晚秔稻之屬稜陵穀黍稷之屬五經  
要義壇于田以祀先農如社月令郡國守相皆  
勸民始耕如儀諸行出入皆鳴鐘皆作樂其有

災青有他故若請雨止雨皆不鳴鐘不作樂後  
漢縣邑皆以乙未日祀先農于乙地魏秦靜議  
風伯雨師靈星先農社稷爲國六神唐韋叔夏  
張齊賢等奏經無先農禮王自爲立社曰王社  
先儒以爲在藉田也永徽中猶曰藉田垂拱後  
乃爲先農然則先農與社一神今先農壇請改  
爲帝社壇以合古王社之義其祭准令以孟春  
吉亥祠后土以勾龍氏配於是爲帝社壇又立  
帝稷壇于西如太社太稷而壇不設方邑以異

於太社開元十九年停帝稷而祠神農氏于壇  
上以后稷配宋雍熙中用大祠制景德四年以  
判太常禮院孫奭言改用上辛後亥日政和四  
年有司議爲中祠尋復爲大祠

附社稷壇考祭法昔歷山氏之有天下也其子  
曰農能殖百穀夏之衰也周棄繼之故祀以爲  
稷家語孔子曰古之平治水土及播殖百穀者  
衆矣惟勾龍兼于社而棄爲稷神易代奉之無  
敢益者明不可與等云左傳蔡墨曰稷田正也

有烈山氏之子曰柱爲稷自夏以上祀之賈逵  
鄭康成皆云烈山炎帝之號杜預注烈山氏神  
農世諸侯按帝王世紀神農本起烈山然賈初  
封烈山爲諸侯後爲天子猶帝堯初爲唐侯然  
也魯語其子曰柱祭法其子曰農者劉炫云益  
柱是名其官曰農猶呼周棄曰稷禮疏湯旣勝  
夏廢柱而以棄代之漢郊祀志或云周興而邑  
立后稷之祠至今血食天下於是高祖制詔御  
史其令天下立靈星祠漢元始中太師光大司

徒宮羲和歆等八十一人議漢興禮儀稍定已  
有官社未立官稷遂于官社後立官稷以夏禹  
配食官社后稷配食官稷稷種穀樹師古曰穀  
樹楮樹也其子類穀故于稷種後漢禮儀制郡  
縣置社稷太守令長侍祠牲用羊豕唯州所治  
有社無稷以其使官古者師行有載社主不載  
稷也宋志以春秋二仲及臘日祭太社太稷爲  
大祀其州縣祭社稷如小祀春秋二祭刺史縣  
令初獻上佐縣丞亞獻州博士縣簿尉終獻牲

用少牢元豐中令州縣社主用石元祐中又下祭服制度于郡縣

附風雲雷雨山川城隍壇考周禮太宗伯以禋燎祀風師雨師漢志雍有二十八宿風伯雨師四海之屬百有餘神師古曰風伯飛廉也雨師屏翳也一曰屏號而說者乃謂風伯箕星也雨師畢星也此志既言二十八宿又有風伯雨師則知非箕畢也後漢縣邑常以丙戌日祀風伯于戌地以己丑日祀雨師于丑地用羊豕唐制

諸郡置風伯壇于社壇東雨師壇于西各稍北  
數十步卑下爲社壇祀用羊一籩豆各八簋簋  
各二宋咸平二年旱詔有司祀雷師雨師大中  
祥符初詔惟邊地要劇者通判致祭餘皆長吏  
親享熙寧中有司請兆風師于西郊祀以立春  
後丑日兆雨師于北郊祀以立夏後申日仍依  
熙寧舊儀以雷師從雨師之位又請用柏柴升  
煙以歆神又請用樂制樂章以爲降神之節元  
制風伯旗青質赤火焰脚畫神人犬身朱髮鬼



形豹汗膊朱袴負風囊立雲氣中雨師旗青質  
赤火焰脚畫神人冠五梁冠朱衣黃袍黑欄黃  
帶白袴皂舄右手仗劍左手捧鍾雷公旗青質  
赤火焰脚畫神人犬首鬼形白擁項朱犢鼻黃  
帶右手持斧左手持鑿運連鼓于火中電母旗  
青質赤火焰脚畫神人爲女子形纁衣朱裳白  
袴兩手運光

附三皇廟考元元貞初命郡縣通祀三皇太昊

伏羲以勾芒配炎帝神農以祝融配軒轅黃帝